

Pilihan raya: Pemuda diarah bersedia

UM - 2 SEP 2002

KUALA LUMPUR 1 Sept. — Pengerusi Pergerakan Pemuda Barisan Nasional (BN), Datuk Hishammuddin Tun Hussein berkata, beliau telah menerima arahan daripada pucuk pimpinan supaya mempersiapkan sayap kanan parti itu untuk menghadapi pilihan raya umum ke-11.

Serentak itu, tegasnya, semua anggota parti perlu menganggap pilihan raya umum akan datang sebagai 'medan perang' dengan setiap aktiviti menjurus ke arah kaedah pilihan raya.

Tegasnya, jentera BN perlu mengenal pasti segala muslihat parti lawan dan mendedahkan kelemahan serta retorik mereka supaya tidak sewenang-wenangnya mempengaruhi pengundi.

Tegasnya, tindakan itu perlu bukan untuk kepentingan parti sebaliknya demi menyelamatkan masa depan rakyat daripada parti pembangkang yang mabuk kuasa.

"Arahan pucuk pimpinan parti ialah kita bersiap sedia menghadapi pilihan raya umum. Oleh itu, Pemuda BN perlu menganggap pilihan raya sebagai satu perang yang cukup penting.

"Kita mesti tentang mereka (pembangkang) habis-habisan dan pastikan DAP, Pas dan Keadilan hancur," katanya.

Beliau berkata demikian kepada pemberita selepas merasmikan Konvensyen Pemuda Parti Progresif Penduduk (PPP) di Pusat Dagangan Dunia Putra (PWTC) hari ini. Hadir sama ialah Presiden PPP, Datuk M. Kayveas dan Ketua Pemuda, T. Murugiah.

Menurut Hishammuddin lagi, sebab itu, Pergerakan Pemuda UMNO yang diketuainya ketika ini sedang memperhebatkan penganjuran kursus berkaitan aspek penambahan ahli, pendaftaran ahli sebagai pemilih dan pewujudan bilik-bilik gerakan pilihan raya.

Tegasnya, kursus selama tiga hari bermula hari ini di Kem Wirajaya, Janda Baik, Pahang itu melibatkan kesemua 165 Ketua Pemuda Bahagian dari seluruh negara.

Program akan turut dihadiri oleh Presiden UMNO, Datuk Seri Dr. Mahathir Mohamad dan timbalannya, Datuk Seri Abdullah Ahmad Badawi.

Menurut Hishammuddin, pembangkang jika berpeluang memerintah negara sebenarnya tidak berupaya memerintah negara lebih-lebih lagi dalam cabaran masa ini yang melibatkan bentuk penjajahan minda.

Dalam aspek ini, tegasnya, mereka cuba meniru persefahaman yang ditunjukkan antara kalangan 14 parti komponen BN.

Ditanya mengenai kemungkinan pilihan raya umum akan diadakan tahun depan, Hishammuddin berkata: "Saya tak tahu tetapi kita sedang bersiap sedia ke arahnya."